

Headline **RM20 juta ubah suai Hospital Mersing**  
Date **05. Mar 2008** Language **MALAY**  
Media Title **Berita Harian (Southern)** Page No **B8**  
Section **News** Article Size **310** cm2  
Circulation **231163** Frequency **Daily**  
Readership **1368000** Color **Full Color**



# RM20 juta ubah suai Hospital Mersing

Oleh Sahlina Sahkirin

**M**ERSING: Hospital Mersing akan berubah wajah tidak lama lagi apabila Kementerian Kesihatan akan mengubah suai dan membesarkan wad pembedahan membabitkan kos RM20 juta dalam Rancangan Malaysia Kesembilan (RMK-9).

Timbalan Menteri Kesihatan yang juga calon Barisan Nasional (BN) Parlimen Mersing, Datuk Dr Abdul Latiff Ahmad; berkata usaha meningkatkan kemudahan di hospital berkenaan penting bagi menampung keperluan kira-kira 90,000 penduduk di daerah itu.

Beliau berkata, ketika ini, pihaknya berpendapat langkah mengubah suai adalah lebih praktikal berbanding memindahkan hospital di lokasi sedia ada berikutan kedudukannya terletak berhampiran pantai cukup strategik dan unik.

"Selain itu, penduduk di sini juga akan mempunyai sebuah klinik kesihatan dengan kos pembinaan bernilai RM16 juta yang akan dilengkapi kemudahan rawatan pesakit luar, klinik ibu dan kanak-kanak, selain kuarters kakitangan.

"Peruntukan membina klinik ber-

kanaan sudah diluluskan Kabinet sebelum ini dan kita dalam proses menyelesaikan perkara berkaitan pemilikan tanah," katanya ketika merasmikan Karnival Kesihatan 2008 peringkat daerah di Mini Stadium Mersing, di sini, kelmarin.

Hadir sama, Pegawai Daerah Mersing, Abd Razak Hassan; Pengarah Kesihatan Jabatan Kesihatan Johor, Dr Marzuki Md Isa; dan calon BN Dewan Undangan Negeri (DUN Tenggara), S Muru Kasvary.

Sebelum itu, Dr Abdul Latiff diiringi lebih 200 penunggang motosikal yang memakai kemeja-T BN dan membawa bendera parti berkenaan dari Dewan Jubli Intan ke pekarangan Mini Stadium Mersing bagi merasmikan karnival berkenaan.

Sementara itu, Abd Razak mengesakan penduduk Mersing dan kawasan sekitarnya supaya dapat menggunakan perkhidmatan kesihatan dengan sebaik mungkin serta mementingkan kesihatan diri dan keluarga.

Sempena majlis itu, persembahan sketsa kesihatan bertajuk 'Pak Uda' dan tarian dari Kelab Seni Budaya, Universiti Putra Malaysia (UPM) juga diadakan.

**TAHNIAH:** Dr Latiff menyampaikan cenderamata kepada Leftenan (B) Basir Abd Rahman yang mengadakan pertunjukan para motor pada Karnival Kesihatan 2008 peringkat daerah Mersing.

